

**TALKING POINT  
DATO' PROF. DR. ZUL AZHAR ZAHID JAMAL  
NAIB CANSOLOR  
UNIVERSITI MALAYSIA PERLIS  
SEMPENA PERJUMPAAN MINGGUAN BERSAMA PENGURUSAN TERTINGGI UNIVERSITI  
1 OGOS 2018  
DI KOMPLEKS SUKAN UniMAP, PAUH PUTRA**

Assalamualaikum Warahmatullahi Wabarakatuh

Salam Sejahtera

**Salam Ilmu, Keikhlasan, Kecemerlangan UniMAP**

**SALUTASI**

**Rakan-rakan saya, Timbalan - timbalan Naib Canselor UniMAP**

**Yang Berusaha Pegawai -Pegawai Utama Universiti**

Dekan-dekan dan Ketua-ketua Jabatan,

Seterusnya staf Universiti Malaysia Perlis yang saya kasihi sekalian.

**KATA ALU-ALUAN**

1. Alhamdulillah, bersyukur kerana masih lagi diberi kesempatan oleh Allah Aza Wajalla untuk berkumpul di pagi yang berbahagia ini untuk mendengar amanat dan berkongsi maklumat terkini mengenai perjalanan universiti dalam Progam Perjumpaan Mingguan Bersama Pengurusan Tertinggi Universiti.
2. Terima kasih diucapkan kepada semua warga UniMAP yang memberikan komitmen dengan menghadirkan diri ke program kita ini.

Hadirin hadirat sekalian,

## INFO KESIHATAN

### PENYAKIT TANGAN, KAKI DAN MULUT (HFMD)

3. Pada minggu ini, saya akan berkongsi Info Kesihatan berkenaan ***penyakit Tangan, Kaki dan Mulut (HFMD)*** yang disediakan Pusat Kesihatan UniMAP.
4. Penyakit Tangan, Kaki dan Mulut (HFMD) adalah jangkitan di mana lepuhan berisi air muncul di tangan, kaki dan dalam mulut. Biasanya penyakit ini bermula dengan demam dan hilang selera makan 1-2 hari sebelum munculnya ruam. Selalunya HFMD tidak serius dan ruam sembuh dalam masa 5-7 hari. Tetapi sebilangan kecil kes didapati merbahaya apabila ia melibatkan komplikasi sistem saraf, jantung dan pernafasan khususnya di kanak-kanak di bawah 5 tahun.
5. Sehingga 18 Julai 2018, kes HFMD di Malaysia yang dilaporkan ialah sebanyak 33,425 kes. Di Perlis, sebanyak 197 kes telah dilaporkan dalam tempoh ini. Jumlah premis yang ditutup di seluruh Malaysia sehingga tempoh ini adalah 419 iaitu 198 taska, 197 tadika/prasekolah dan 23 sekolah.
6. HFMD disebabkan oleh virus kumpulan enterovirus. HFMD merebak dari individu ke individu dengan kontak secara langsung melalui lelehan hingus, air liur, najis dan cecair ruam dari mereka yang dijangkiti. HFMD selalunya terjadi dalam kelompok kanak-kanak yang ditempatkan bersama. Ia merebak melalui tangan yang tidak dicuci bersih selepas melakukan penukaran lampin atau tersentuh air liur yang mana membolehkan virus berpindah daripada satu kanak-kanak ke kanak-kanak lain.

7. Diagnosa HFMD dibuat oleh pengamal perubatan berdasarkan ciri-ciri unik munculnya lepuhan pada mulut, tangan dan kaki bagi kanak-kanak yang kelihatan sihat. Tiada rawatan khusus bagi jangkitan selain dari rawatan mengurangkan gejala-gejala.
8. Ibu bapa / penjaga adalah diminta mendapatkan nasihat daripada doktor secepatnya jika anak mereka mendapat tanda-tanda HFMD.
9. Mereka seharusnya peka kepada sebarang perubahan tingkahlaku anak-anak mereka seperti kerengsaan dan mengantuk. Jika mereka tidak mahu minum atau makan, muntah berterusan, atau mengantuk, ibu bapa / penjaga hendaklah segera membawa anak mereka ke klinik atau hospital.

#### 10. Pencegahan

- Amalkan mencuci tangan secara konsisten menggunakan air bersih dan sabun sebelum menyediakan makanan, selepas keluar tandas, selepas menukar lampin dan mencuci najis.
- Menutup mulut dan hidung bila batuk dan bersin.
- Tidak berkongsi pakaian, tuala, perkakas makanan dan minuman serta mainan.
- Ibu bapa / penjaga hendaklah memastikan diri mereka bersih terlebih dahulu sebelum menguruskan anak atau bayi mereka.
- Bersihkan mainan, kerusi dan meja yang tercemar dengan air liur anak.
- Anak-anak hendaklah dijauhkan daripada tempat awam yang sesak seperti, tempat mainan, pasar dan pengangkutan awam sekiranya mereka mempunyai tanda-tanda jangkitan.
- Elakkan menghantar anak yang mempunyai gejala seperti di atas ke sekolah, pra sekolah atau nursery supaya penyakit tersebut tidak merebak ke kanak-kanak lain.

## **PROGRAM TELAH BERLANGSUNG**

Warga UniMAP yang saya kasihi

### **PERLIS 4.0 & MALAM KILAUAN CAHAYA**

11. Petang Rabu lepas iaitu pada 25 Julai telah berlangsung Majlis Penutup Pertandingan Inovasi 'Perlis Engineering Research Learning & Innovation Symposium (PERLIS 4.0) bertempat Dewan Kecemerlangan UniMAP. Sebanyak 45 produk dari 13 sekolah rendah dan menengah telah menyertai PERLIS 4.0. Penyertaan mereka sebenarnya membuktikan bahawa anak muda walaupun masih kecil, pemikiran mereka sangat kreatif dan inovatif. Pemenang PERLIS 4.0 akan dibawa bagi menyertai pameran penyelidikan antarabangsa di Taiwan pada Disember nanti. Merekalah pewaris yang akan memajukan negara bagi mencapai matlamat negara untuk menjadi negara berpendapatan tinggi. InsyaAllah.

12. Saya juga ingin mengucapkan tahniah kepada Unit Komunikasi Korporat (UKK) kerana berjaya membantu pihak Istana dalam merealisasikan Malam Kilauan Cahaya di Istana Arau pada hujung minggu ini lepas iaitu 27 dan 28 Julai 2018 (Jumaat dan Sabtu). Khabarnya seramai 30 ribu pengunjung hadir memeriahkan program ini dan semuanya berjalan dengan lancar. Sekali lagi tahniah diucapkan.

### **KARNIVAL VARSITI IMTGT**

13. Baru-baru ini, telah berlangsung Karnival Varsiti Indonesia, Malaysia dan Thailand Growth Triangle (IMTGT) bermula 20 hingga 26 Julai 2018 di Universiti Teknologi MARA, Cawangan Perlis.

14. Saya dimaklumkan bahawa UniMAP menghantar 87 peserta dan mereka ini terdiri daripada 64 pelajar dan 23 pegawai yang dibahagi kepada tiga kategori iaitu sukan, kebudayaan dan seminar.
15. Mereka ini menyertai Karnival tersebut bagi mewakili Malaysia bersama-sama pelajar dari Universiti Teknologi MARA (UiTM) Cawangan Perlis, Universiti Utara Malaysia (UUM), Universiti Sains Malaysia (USM).
16. Khabarnya terdapat 11 universiti yang terlibat dalam IMTGT yang masing-masing mewakili Negara mereka iaitu Indonesia diwakili Universitas Sumatera Utara (USU), Institut Teknologi Medan (ITM), Universitas Syiah Kuala (USK) dan Universitas Negeri Medan (UNIMED). Manakala Thailand diwakili Prince of Songkhla University (PSU), Thaksin University (TSU), Rajamangala University of Technology Srivijaya (RMUTSV) dan Walailak University (WU).
17. Tahniah kepada pasukan bola keranjang UniMAP kerana Berjaya menduduki tempat ke - 3 dalam IMTGT. Berikan tepukan yang gemuruh kepada pasukan bola keranjang dan pegawai bertugas mererka.

### **MAJLIS PEMAKAIAN PANGKAT PEGAWAI SUKARELA PALAPES UniMAP**

18. Pada 23 Julai saya berkesempatan untuk menyempurnakan Majlis Pemakaian Pangkat Pegawai Sukarela PALAPES UniMAP yang berlangsung di pejabat saya di bangunan KWSP.
19. Dikesempatan ini, tahniah diucapkan kepada empat (4) Pegawai Sukarela PALAPES UniMAP yang telah dinaikkan pangkat dari Leftenan ke Kapten. Berikan tepukan kepada Leftenan Lokman Hakim Ibrahim, Leftenan Muhammad Khairy Md Naim, Leftenan Pubalan Nadaraja dan Leftenan Leong Kean Wei. Apa yang membanggakan UniMAP apabila kesemua pegawai yang dinaikkan pangkat hari ini merupakan alumni PALAPES UniMAP.

**MAJLIS PENGANUGERAHAN PINGAT KOMISIONER JENERAL PENJARA DAN PINGAT JASA PENJARA ZON UTARA 2018**

20. Tahniah dan sila berikan tepukan kepada Prof. Madya Dr. Huzuli Hussin yang dianugerahkan Pingat Komisioner Jeneral Penjara Kelas Kedua pada Majlis Penganugerahan Pingat Komisioner Jeneral Penjara dan Pingat Jasa Penjara Zon Utara 2018 yang berlangsung pada 21 Julai 2018 bertempat di Pusat Latihan AADK, Sungai Petani Kedah.
21. Semoga dengan penganugerahan sebegini akan menyuntik semangat kepada semua warga UniMAP bagi berbakti kepada UniMAP dan Negara Malaysia yang kita cintai ini.

**20 PELAJAR TAHUN AKHIR UniMAP TELAH DITAWARKAN PEKERJAAN OLEH SYARIKAT TESSOLVE SEMICONDUCTOR SDN. BHD.**

22. Oh ya sebelum terlupa, ingin saya kongsi kepada semua bahawa seramai 20 pelajar tahun akhir kita telah ditawarkan pekerjaan oleh Syarikat Tessolve Semiconductor Sdn. Bhd. di Pulau Pinang. Para pelajar ini akan bergraduat pada Oktober nanti tetapi mereka ini akan memulakan pekerjaan di syarikat berkenaan pada Ogos. InsyaAllah.
23. Mereka adalah dari Pusat Pengajian Kejuruteraan (PPK) Mikroelektronik (lima orang), PPK Komputer dan Perhubungan (11 orang) dan empat daripada Fakulti Teknologi Kejuruteraan (FTK) Elektronik.
24. Ini menunjukkan bahawa pernyataan graduan UniMAP laris di pasaran pekerjaan bukanlah omongan kosong kerana kita berjaya membuktikan bahawa pelajar kita sememangnya telah dilengkapi dengan ilmu pengetahuan dan latihan praktikal yang mencukupi. Ini menjadikan mereka graduan readymade yang bersedia pada bila-bila untuk terjun ke pasaran pekerjaan.

25. Tahniah kepada para pelajar ini dan tahniah juga kepada Pusat Kerjasama Industri dan Agensi Kerajaan (CIGC) UniMAP kerana berjaya membantu para pelajar ini menempatkan diri di syarikat multinasional.

## **PROGRAM BAKAL BERLANGSUNG**

### **PENYERAHAN WAKAF TUNAI RM 1 JUTA**

26. Pada 2 Ogos nanti akan diadakan Majlis Penyerahan Wakaf Tunai RM 1 juta oleh pihak Bank Rakyat bertempat di Auditorium Perpustakaan UniMAP Pauh Putra. Tuanku Canselor dan Tuanku Pro Canselor berkenan berangkat ke majlis itu nanti. Semoga majlis kita itu nanti akan berjalan dengan lancar dan diberkati oleh Allah Aza Wajalla. InsyaAllah.

## **PENUTUP**

27. Sebelum mengakhiri ucapan saya pada hari ini, saya pasti semua warga UniMAP sedia maklum mengenai situasi pelajar kita di Kolej Kediaman Tun Abdul Razak di mana seramai 26 pelajar kita telah didiagnosa sebagai Influenza Like Illness (ILI). Mereka ini telah diasingkan bagi mengawal ia dari merebak dan menjangkiti orang lain. Apa yang saya harapkan adalah semua warga UniMAP harus mengamalkan penjagaan kebersihan diri dan kawasan sekitar agar tiada mangsa baharu yang dijangkiti ILI ini. Sekiranya anda berasa tidak sihat seperti demam dan batuk, janganlah teragak-agak untuk pergi ke klinik atau hospital berdekatan bagi mendapatkan rawatan yang sewajarnya.

28. Saya rasa cukup sahaja sampai di sini ini. Semoga perkongsian pada hari ini memberikan manfaat kepada kita semua. Saya sudahi dengan Wabillahitaufik Walhidayah Wassalamualaikum Warahmatullahi Taala Wabarakatuh.